

وقت و عتبه

شعبی جلد

عبرانه - ماهنامه اول ۱۹۲۶

صالی : ۱ و ۲

دارالفنون

ادبیات و فلسفه و تاریخ و جغرافیا و ادبیات

فلسفه ، اجتماعیات ، تاریخ ، جغرافیا ، ادبیات

ایکمی آید بر نشر اول نور

مستدرجات

احمد رفیع
فائق صبری
احمد رفیع
حامد سعیدی
علی قنار
نجیب عاصم
یوسف برجست

دیوشیرمه اصولی ، عجیبی اوغلانلر
جوغرافیا توصیفلرنده ناظم اصوللر
قبریس و تونس سفرلرینه عائد رسمی وثیقلر
مختلف دورلرده آنادولونک یوللری
قره دکن ییطرفلغنک اخلاقی و لوندره قونفرانسی
علم لسان
کتابیات

استانبول - می مطبعه

۱۹۲۷

قره دکز بیطر فلغنیك اخلاالی و لوندره قونفرانسی

پارس معاهده سی احکامیجه قره دکزک حال بیطرفی یه وضعی وروس قوه بحریه سنک
تحدیدی روسیه دولته پک آغیر کلمکده و دولت مشارالها معاهده مذکور احکامک
اخلاالی ایچون فرصت کوزتمکده ایدی. ۱۸۷۰ تاریخنده فرانسه وپروسیا آراسنده آچیلان
محاربه کندیسنه بو فرصتی بخش ایتدی. چونکه پارس معاهده سنک محافظه احکامنده اک
زیاده علاقه دار اولان دولتلر اوصره ده روسیه یی بویولده اجرا ایله یه جکی تشبثدن منع
ایده بیله جک وضعیتده بولونما یورلردی: فرانسه دولتی پروسیایه قارشى مغلوب اولمش،
ایمپراطورلق سقوط ایتمش، تشکلیدن مدافعه ملیه حکومتی آنجق فرانسه نك موجودتنی
قورتارمقله مشغول بولونمش ایدی. پروسیا دولتی ایسه غلباتی اتمامه وثمره غالبیتی اقتطافه
حصر آمال ایله مکده و ذاتاً شرق مسئله سنه اودرجه علاقه کوسترمه مکده ایدی. آوستریا
دولتی صادوا مغلوبیتندن هنوز کندیسنی طویلایه مامش اولدیغی کبی ایتالیا دولتی ده رومانی
ید ضبطنه کچیره رک ایتالیا اتحادینی اکمال ایله واصل سرمنزل آمال اولوب قره دکز
مسئله سیله علاقه دار دکادی. ایشده اک زیاده علاقه سی اولان انکلتزه دولتنک ایسه
آوروپاده بر مظاهر بولمادجقه روسیه یه قارشى حرکات فعلیه یه قیام ایده میه جکی درکار
ایدی. با خصوص که اوصره ده رأس حکومتده بولونان غلادستون قاینه سی طوغرودن
طوغرویه انکلتزه نك منافعه نه تعلق ایتمین مسائله عدم مداخله طریقنی اختیار ایله مکده
وقاینه نك رئیس اساساً دولت علیه یه قارشى فکر خصومت بسنه مکده ایدی. روسیه باش
وکیل وخارجیه ناظری پرنس غورچاقوف بو فرصتی فوت ایتهمک ایچون میچ قلعه سنک
سقوطنی متعاقب دولتلره برتحریرات عمومیه ارسالیه آوروپا موازنه سنک اساسی عداولونان
مقاولات دولیه نك براییک سنه دن بری دوچار اولدیغی تغیرات کشره ومتعاقبه دن، و ۱۸۵۶
معاهده سی روسیه نك قوه بحریه سنی درجه نهایه ده تحدید وبوکا مقابل قره دکز بیطر فلغنی
تأسیس ایتدیکی حالدده دولت علیه بحرسفیدده و بوغازلرده غیرمحدود صورتده قوه بحریه
بولوندر مق و فرانسه وانکلتزه دولتلری ده دونانمالرینی برلشدرمک صلاحیتنی محافظه ایله ش

اولدیغندن، و مذکور عهدنامه متنتجه كرك حكومات ساحلیه و كرك حكومات ساثره سفائن حربیه سی قره دگز د خولدن رسماً ممنوع ایکن بوغازلر مقاوله نامه سی حکمتینه سفائن حربیه نك یالکزر وقت صلحه بوغازلردن مروری منع ایدلمش اولسی جهته بو تناقضدن طولای روسیه ساحلری هر دولتک هدف تعرضی اوله جغندن، و آوروپا مقاولات دولیه سنك اکثرینه اصابت ایدن سدمه انحلالدن مذکور معاهده دخی قورتوله مایوب خط حرکتی دول معظمه نك تحت کفالتنده اولمق اوزره تعیین ایدیلن مملکتینجه (رومانیا) نص عهده مخالف بر طاقم انقلابات ظهوره کلهرك باب عالینک موافقتنه و دول معظمه نك رضالرینه قارشى بونک عهدنامه احکام صریحه سنه مغایرتی اخطار یولنده روسیه سفراسندن بشقه رفع آواز ایدن اولمادیغندن، و بحر سیاهک هیچ بر شرط ایله مقید اولمایان بیطرفلغنی وجودلریله اخلاقی ایدن مکمل فیلولرک متنوع بهانه لرله مرورینه مساعدده ایدلایکندن، و ۱۸۵۶ عهدنامه سنك حین تنظیمنده وجودی متصور بولونمایان زرهل سفائنک احداثی ده روسیه نك قوه بحریه سنی رقات ده تنقیص و بر حرب ظهوری حالنده مهالکنی تزید ایله مش ایدوکنندن، روسیه ایمپراطوری اساسلی شرائطی بوضورتله اخلاقی قلنمش اولان مذکور عهدنامه نك قره دگز ده حقوق حکمرانی سنی تحدید ایدن قیود حکمیه سیله بعدما کنديسنى مقید عدایمه جکنى، و قره دگز ده بولونه جق سفائنک حجمی و مقدارینی تعیین ایدن مقاوله نامه نك بطلان حکمنی طرف شاهانه یه تبلیغ ایله مک جمله وظائفندن بولوندیغنی، و ذات شاهانه یه ده حقى استعمال صلاحیتى بخش ایتمکه برابر روسیه دولت نك بو باده کی حقوقی کاملاً استعماله بدء ایله یه جکنى، و مع هذا عهدنامه مزبورک دولت عثمانیه یی آوروپا جمعیت دولیه سنه ادخال ایدن احکام عمومیه سنی قبولده دوام ایدهرک احکام مذکورده نك تصدیق ویا تجدیدی ویا خود اقطار شرقیه نك آسایشی و موازنه دولیه یی تأمین ایدهرک مقاولات محقه یه تحویلی ایچون عهدنامه یی امضا ایدن دولتلرله مذاکره مهیا اولدیغنی بیلدیرمشدر .

غورچاقوفک تحریرات عمومیه سی آوروپاچه عمیق برتأثیر حاصل ایتدی . بوکا قارشى اک زیاده اظهارانفعال ایدن انکلتره دولتی اولدی . انکلتره خارجیه ناظری لورد غرانویل غورچاقوفک نوطه سنه جواباً مشارالیهک حقوق عمومیه قواعدی خلافتنه اوله رق سرد ایله دیکی نظریه یی رد و جرحه ابتدار ایله برابر اوصرده آوروپاده اک زیاده کسب نفوذ ایتمش اولان پروسیا دولتی ده انکلتره نك فکرینه اماله ایچون خارجیه مستشاری «اودوروسل» ی

پرنس بسمارق نزدینه اعزام و ایجاب ایدرسه انکلتزه دولتنک حربدن ده چکنمه یه جکنی افهام ایتدی. آوستریا وایتالیا قاینه لری دخی بو خصوصده انکلتزه قاینه سنک افکارینه پیرواودی. آوستریا خارجیه ناظری قونت «بایست» ده جوابی نوطه سیله غورچاقوفک نظریاتی تنقید ایلده دی. لورد غرانویل اولباده کی نوطه سنده روسیه دولتی ۱۸۵۶ عهد نامه سنک قره دکنزده روسیه نک حقوق حکمرانیسنی تحدید ایتمکده اولان احکامنی نقضه صلاحیتی ادعا ایلهمکده ایسه ده احکام مذکوره منفسخ عد ایدلدیکی تقدیرده بوتون عهد نامه نک فسخ اولونمش صایله جغنی، و حالبوکه بر عهد نامه نک تمامندن ویاخود بر قسمندن متعاهدینی ویا بونلردن برینی وارسته طوتمق حق و صلاحیتی عموماً مسلم اولان قاعده ایجابجه آنجق دول متعاهده یه عاڈ اولدیغنی، و روسیه دولتی کندیسنجه مجروح عد ایتدیکی احکام عهدیه یی دولت لک تدقیقنه عرض ایده جک یرده احکام مذکوره دن وارسته بولوندیغنی تبلیغ ایدوب بوصورتله هر نوع معاهدات دولیه نقض ایدلمش اوله جغنی، و معاهدات دولیه دن مقصد متعاهدینی بربرینه ربط ایتمکدن عبارت اولوب اومقصدله هربری حقوق و سربستیسنک بر قسمنی فدا ایتمش اوله جغنی درکار ایکن روسیه دولتی طرفندن سرد ایدیلن قاعده یه کوره بونلردن یالکیز بری ایسته دیکی کی حرکتده مختار بولونمق و عهد نامه نک مرعیت وعدم مرعیتی آنک رأینه محول اولمق لازم کله جکنی بیان و انکلتزه دولتی روسیه دولتنک تحریراتی تأسف فوق العاده ایله اخذ ایدوب بو ماده کندیسنک روسیه ایله وقایه سنه سعی و اقدام ایلهمکده اولدیغنی مناسبات حسنه یی اخلاال ایده جکنی درمیان ایتشدیر.

آوروپا مورخلری غرانویلاک نوطه سنک شدتندن وانکلتزه نک بومسئله یی سبب حرب عد ایده جک درجه ده انفعالنندن بحث ایتمکده لرایسه ده مذکور نوطه ده نه اودرجه اثر شدت ونه ده حربی احساس ایده جک عزم ونیت کورولمه مکده در.

قونت بالسنک جوابی نوطه سنده ایسه پارس معاهده سنک اون دردنجی ماده سنک ذکر یله کلامه بدء ایدیلهرک ماده مذکوره مندرج تعهد علی العموم مقاولات دولیه یه ضمناً داخل اولمق حسبیلله دول معاهده دن هیچ برینک نه درلو بر سببه مستند اولورسه اولسون کندیلمکندن بونک حکمندن چیقامایه جغنی واولباده معاهد اولان سائر دولت لک موافقتی لابد بولوندیغنی و روسیه دولتی طرفندن سرد اولونان دلائله آوستریا دولتنک جواب ویرمه سی محضاً بر اثر رعایت اولدیغنی بیان قلندقدن صوکر مملکتین اداره سی دول معاهده دن اولمایوب دولت علیه نک تابعی بولوندیغنی، و کندی حقوق و منافعی محل صورتده احکام

معاهده ده اجرا قلنان تعدیلاتی طلب ایدن دولت علیه اولمادیغی، و روسیه دولتنجه بحر سیاهه دخولندن شکایت اولونان سفن حربیه دن مراد هانکی سفائن اولدیغی مجهول ایسه بوکا قارشی وقتیه اجرای تبلیغات ایدمک و معاهده مذکورنک عدم حقانیتندن ده بحث اولونیورایسه ده مطالعه مشروحه یی معاهده نک حین عقدنده درمیان ایتک لازمیدن ایدوکی ایضاح و دولت مشارالیهانک شو حرکتندن طولایی آوستریا دولتنجه حاصل اولان اسف عظیم ایراد و آوروپانک احکام معاهداته هر وقتدن زیاده رعایته محتاج بولوندیغی بر زمانده روسیه نک وقوعه کلن حرکت خودسرانه سنک نتایجی حقنده اهمیتله نظر دقتی استجلاب اولونمشدر . ایتالیا قرالی ده دولت علیه سفیریه واقع اولان ملاقاتنده روسیه نک بو حرکتی عبث تعبیریه توصیف و بونک پروسیا دولتیله بالاتحاد ترتیب ایدلمش اولمسی ظنی تأیید ایله برابر انکلتره و آوستریا دولتری تشبث واقع علیهنده متحداً حرکتیه قیام ایده جک اولورلرایسه کندیسنک دخی بزه ماده معاونته حاضر بولوندیغی تأمین ایله مش و خارجییه ناظری «ویسقوتی ونوستا» انکلتره و آوستریا دولتری طرفندن روسیه نوطه سنه ویرلمش اولان جواب قونغریه یول آچدیغندن پک ده خیرلی اولمادیغی سفیر مزه محرمانه افاده ایتدیکی حالد ایتالیا دولتی نامنه اعطا ایله دیکی جوابی نوطه همان آوستریانک جوابیه متحداً مال بولونمشدر . فقط ناظر مشارالیه نتیجه یی کوزل کشف ایتمشدر .

غورچاقوف اتحاد ایتدیکی قرارک تأثیراتی تعدیل مقصدیه انکلتره حکومتنه بر طاقم ایضاحات اعطاسنه قیام ایدمک ایمپراطورک اشبورقاری شرقده متخذ پولتیقه سنجه برکونه تبدیلی مستلزم اولمایه جغنی، و انکلتره و روسیه دولتری دولت علیه نک بقاسنی انحق تبعه غیرمسلمه سیله آرالرنده کی اختلافاتک دفع و تسکینی صورتیه آرزو ایتمکده اولوب بو یولده کی اقداماتدن ثمره مفیده حاصل اوله مایوب ده بالاخره بربحران ظهوره کلیر ایسه دولتین مشارالیه آوروپا دول معظمه سنک اتفاقیله ایشی حل و فصله متحداً قرار ویرمش اولدقلرندن بو مسئله دهده انکلتره ایله روسیه بیننده بر اتفاق قوی حصولی ممکن اوله بیله جکنی، و بویله براتفاق شرقده تحدث ایده جک اختلاللر سببیه آوروپا موازنه سنی اخلاص تهلکه سندن وقایه و آسایش عمومی محافظه ایله یه جکنی بیلدیرمشدر که تکلیف مذکور وقتیه منجیقوفک سفارت فوق العاده سی صره سنده ایمپراطور برنجی نیقوله طرفندن انکلتره نک پترسبورغ سفیری «سرهاملتون سیمور» واقع اولان تکلیفک شکل دیکریدر .

غورچاقوف طرفندن غرانویلیک جوابی نوطه سی اوزرینه کوندریلن ایکنجی نوطه ده ده

ایمپراطور ۱۸۵۶ عهدنامه سنه وضع امضا ایدن دولتلردن هیچ برنی تهدید و یا نفوذنی کسر ایتک قصه دنده اولمایوب یا الکز وطننه عائد بر وظیفه محبره یی اجرا قیدنده بولوندیغنی، و بو مقصدک دول متعاهده نك اتفاقیه حصولی کندینرنجه ده مطلوب ایدیه ده آسایش عمومی یی محل اولان اسباب منازعه یی دولتلرک بالاتفاق بر طرف ایتهلری ضمننده دفعات ایله اولونان تشبثاتک هیچ بر ثمره سی کوروله مدیک کی محاربه حاضره نك امتدادی و فرانسه ده بر حکومت منتظمه نك فقدانی جهتیه یاقینده اویله بر اتفاقک حصولی ده ممکن اوله مایه جغنی، والیوم آوروپا ۱۸۵۶ سنه سنده کی حالد اولادیغندن احکامی یوما فیوما منفسخ و کندیسی ایچون مضرات متحقق اولان بر معاهده نامه ایله روسیه نك مقید بولونه مایه جغنی و بونکله برابر روسیه دولتی عهدنامه نك بوتون بوتون فسخی داعیه سنده اولمایوب احکامنک تصدیق و یا تجدیدی و اقطار شرقیه نك آسایشنی و آوروپانک موازنه سنی تأمین ایچون بر معاهده جدیده عقدی ضمننده دول متعاهده ایله اتفاقه حاضر اولدیغنی، و مسائل شرقیه ده الکیزیده علاقهدار بولونان دولتین بیننده دائمی صورتده موجب اغبرار اولان اسباب ازاله ایدلیدی و آرا ده کی مناسبات حسن اتفاق ایله تأیید قلندیغنی تقدیرده شرقک امنیتی برقات دها تقویه ایدلمش اوله جغنی، و اشبو مباحثه نك انکلتزه ایله روسیه بیننده مناسبات حسنیه یی اخلاقی ایدمکدن بختله لورد غرانویل طرفندن اظهار اولونان تأسفدن روسیه دولتکده حصه مند اولدیغنی درمیان ایتمشدر.

پرنس بسمارق دخی ملاحظات سیاسیه سی ایجابجه بو حرکتدن ممنون قالمامش ایسه ده فرانسه دولتیله بینلرنده تحدت و دوام ایدن محاربه ده حقلرنده خیر خواهانه بیطرفلق مسلکنی التزام ایتمش اولان روسیه دولتنه قارشى علیهدارانه بروضعیت آلهرق آنی دلکیر ایتمکده ایستهمه دیکندن انکلتزه دولتک اعزام ایله دیکى « اودوروسل » ی حسن قبول ایله روسیه نك شو اعلانی کندیسنجه بر قضای نا کهانی صورتنده ظهور ایتدیکنی و بوندن نه درجه تأثرات حاصل ایله دیکنى بیان ایتمکله برابر بین الدوال بر قونفرانس عقدی صورتیه صلاحاً تسویه مصلحت آرزوسنی اظهار و طرفینجه موجب خشنودی اوله جق وجهله حل مسئله ایچون روسیه دولتی نزدنده تشبثات مقتضیه ده بولونه جغنی اتیان ایله مسی اوزرینه انکلتزه دولتی دخی مشار الیهک تکلیفی وجهله قونفرانس عقدینه موافقت کوس-ترمش و فقط غورچاقوفک ایکنجی تحریراته یازدیغنی جوابده بویله بر قونفرانسک اجتماعنی « دول معظمه نك هر درلو تعهدات اعدادیه دن بری اوله رق داخل اوله لری » شرطنه تعلیق ایله مشدر.

دولت عليه جه كيفيتك صورت تلقيسنه كلنجه: بو خصوصده روسيه دولتى طرفندن اتخاذا قلنان قرار غورچاقوفك تحريرات عموميه سيله پارس معاهده نامه سنك ممضيلى اولان دولتره اعلان اولوندينى كى دولت عليه يده تبليغ قلنمه سى اوزرينه كفيت خواص وكلايينده موقع تذكره قونوله رق روسيه لونك تشبثات واقعه سى انكلتره دولتى جانبندن تقبيح ايله دولتر طرفندن مشتركاً امضا اولونمش اولان بر معاهده نك خودبخود ابطالى قبول اولونه مائه جغنه ن بحثله تحريرات مبلغه يه جواب ويرلمش، و آوستريادولتى طرفندن ده روسيه نك تحريرات عموميه سنده مندرج ادله و براهينى ردأ جواب ارسالى قرار لاشديرلمش، و ايتاليا دولتنك دخى انكلتره جه اتخاذا اولونه جق مسلك پوليقييه يه تماميله توفيق حركت ايدى جكى اكلاشيلمش اولوب انكلتره و آوستريانك اولبابده كى تبليغاتنك رنك وروشنجه ايشك بر قونغريه حواله سنه استعداد ويرمه سى ملحوظ وروسيه لولر شايد بوكا ياناشمايوب ده اعلانلر نده صورت اصرار كوسترلر سه دول معاهده نك حرب درجه سنه قدر كيدوب كتمه يه جكارى مجهول بولونديغندن بونده دولت عليه جه كيديله جك اوج طريق اولوب برنجيسى روسيه نك اشبو اعلاننك بلاقيد و شرط قطعياً ردى، ايكنجيسى مصلحتك بر قونغريه حواله سى، اوچنجيسى ده ايش بر چوق مكاتبه و مباحثه ايله سورونوب ده نهايتنده ينه روسيه لولرك ديدكلرى اوله جق اولدينى حالده بويله اولمقدن ايسه بعض شرائط تأمينيه ايله شمدیدن موافقت ايدلمه سى صورتلرى اولديغندن، و اشبو صورثلاسه موازنه اولندقدن برنجى صورتك اختياريله روسيه لونك اعلانى عليهنده رسماً پروتستو ايديلوب ايشى بلاقيد و شرط حاله ترك ايتك و يا خود برأ و بجرأ تجاوزى حرکاته قيامى كوزه اليرمق اقتضا ايدرك مصلحتى حاله ترك ايله مك مضر اوله جنى مثللو متفقسر حرب تجاوزى اختيارى دخى اذهانه ملايم كله ديكندن، و مسئله نك بر قونفرانسه عرضى ايسه نتيجه سى اولدن كسديرلك قابل اوله مائه جق انواع مشكلات و مخاطراتى مؤدى اوله جنى جهته دولتي عليه يى او طريقه سوق ايتك دكل، بشقه لرى طرفندن تكليف اولونسه رد و دفعنه چالشمق الزم بولونديغندن، و اوچنجى صورت مسئله نك ده اهاون وجهله حلى ميسر اوله مائه جغنه جزم حاصل ايدلدكن صوكر كيديله جك بر يول اولديغندن بحثله دول ضامنه نك نيات و تصميماتى حقنده آله جق معلومات و ايضاحاته كوره ايجاب حال و مصلحتك تكرار تذكرى قرار لاشديرلمش و غورچاقوفك تحريرات عموميه سنه جواب اعطاسى جهتنه كيدلمه مشدر .

اولبابده پترسبورغ سفارتيله باب عالي بيننده جريان ايدن مخبر اتدن استنباط اولونديغنه

کوره لورده غرانویک نوطه سی انکلتزه سفیری طرفندن تودیع اولوندیغی صرهدده غور جا قوف
 سفیره قارشو دولت علیه روسیه مطالبنگ حقانیتنی طانیقندن ابا ایتیه جکی امیدنده بولوندیغی
 وعکس تقدیرده نتایجندن ینه کندیسکی متضرر اوله جگی، و روسیه دولتی عسا کرینه برنفر
 بیله ضم ایتیمکسزین، روسیه ننگ نفوذ مغنویسندن استظهار ایدن ترکیه اهالی خرسیتیانیه سی
 ادنا بر اشارتله فوج فوج حرکته قیام ایده جکری یولنده بالا پروازانه لسان استعمال
 ایله مش اولدیغی حالدده بالا خره دولت علیه سفارتنه اعزام ایله دیکی آسیا اداره سی مدیری
 واسطه سیله بوتشبتنگ دولت علیه ایله غایت صمیمی ودوستانه مناسباته مبدأ اولمه سی املنده
 بولوندیغی وبونک حصولی ایچون عالی پاشانک « افکار فائقه کاردانی و تألیف کاریسنه » استناد
 ایله دیکنی و بوبابده بر نتیجه متحده انه یه وصول مقصدیله و سفیرلر معرفتیه پاشای مشارالیه ایله
 محرمانه مخبره و مذاکره یه کیریشمکه آماده اوله جگی اشراب ایتیمش و سفیرلر ایله بالذات
 واقع اولان ملاقاتنده ده « عالی پاشا ایله بر ساعتجک ملاقات ممکن و میسر اولسه ابدی
 طرفینک خوشنودی و رضاسی ایله هرشی یاپیلور بتر ایدی » صورتنده معامله جمیله ابرازیه
 برابر دولت علیه ک دول سائر ایله اولان مناسبات حسنه سنه خلل کلیمکسزین ترکستانک
 شمیدی یه قدر نه داخل و نه خارجاً هیچ بر وقتده مالک اوله مادیغی بر حال و موقعی کندیسنه
 تأمین ایده جک صمیمی براتفاق عقدی کرک ایمپراطورک و کرک کندیسنگ جمله آمانندن
 بولوندیغی اظهار ایده جک درجه یه قدر کتمشدر .

او صرهدده مأذوناً بولوندیغی پترسبورغدن عودت ایدن روسیه سفیری جنرال
 اغناتیف صدراعظم و خارجییه ناظری عالی پاشا ایله وقوعبولان ملاقاتنده روسیه دولتی
 سلطنت سذیه قارشو ابواب موالاتی سدا یله حرکات خصمانه یه تشبث ایله مک نیتنده و قره دگز
 ایچون یکی بر دونانما احداثی تصورنده اولمادیغی، و موضوع بحث اولان ماده ننگ معاهده نامه ده
 وجودی ایمپراطورک حقوق حکمداریسنی تحدید ایله دیکی جهتله نه بالذات بویله بر اساسک
 تحت تأثیرنده قائمه ونه ده اخلافنه شو یوزدن حصه تأثیر بر اقمغه مشارالیه تحمل ایده میهرک
 احکام مذکورننگ المحاسنی قطعاً مراد و اعلان ایتیمش اولدیغی، و شو قرار دولتینک استقرار
 مخادتی و مسئله شرقیه نامیله السنه عالمیانده داستان اولان احوال مغنویه ننگ بالکلیه محو
 و ابطالی کبی خیرلی و نافع بر نتیجه مصلحه وجوده کتیره جکنی افاده ایله مسنه مقابل عالی
 پاشا طرفندن دوات علیه نظرنده مسئله شرقیه دینیلن شی اساساً موجود اولمایوب، و مع مافیه
 بو لقردی پارس معاهده سیله روسیه دولتنک حقوق حکمرانیسی تحدید ایدلمه سی اوزرینه

تکون ایتمه یوب، اسکی برسوز اولدیغندن شمدی بو صورتله محوی حاصل اوله جغنی ذهنلر قبول ایله مدیکی، وبویله مقاولات مشترکه دوایه نک بر ویا بر قاج ماده سی معاهدیندن برینک منافعه طوقوندیغنی کی آنلری خودبخود ابطال ایتک قاپوسی آچیلنجه بر مدت صوکره معاهده نک سائر موادینک دخی مضر عد اولونه رق جرح ایدله سی و آرتق دولتر بیننده عقد اولونمش و اولونه جق عهدک حکمی قالمامه سی مخاطره سی ملاحظه اولونمق اقتضا ایده جکی، و اشبو قاعده نک ویردیکی عبرت اوزرینه اکثر احکامی حالاً و زماناً حقوق معززه سلطنت سنییه یی تحدید ایتمش اولان معاهدات عتیقه یی خودبخود منسی وملغی حکمنده طوتمغده دولت علیه نک حقلی اوله سی لازم کله جکی، و شمدیکی حالده قره دگزده دونانما یاپدیرمق نیتنده بولونما دقلرینه دائر اولان تأمینات تعدیل حال ومصلحت ایدمه یوب چونکه معاملات دولیه بر طاقم تغیراته تابع اولدیغندن بر کره سررشته عهد الدن کیدنجه ایلریده شو توثیقات شفاهیه نک هیچ بر فائده سی اوله مایه جغنی بیلدیرلمشدر. اغنائیف جانبندنده قره دگزده روسیه نک قوه بحریه سنک تحدیدی ایکی دولت آراسنده اغبرار دائمی یی مستلزم اولوب طرفینده خلوص اولمادقجه عهدک تأثیری اوله مایه جغنی، وبوقید اورتهدن قالدیرلقدده دولت علیه دخی کندیسنه مضر عد ایتدیکی عهد عتیقه یی منفسخ حکمنده طوتوبده سائر دولتر قبول ایله دکلری حالده روسیه نک دخی، وفاقته حاضر بولوندیغنی یولنده مقابله ایدلمشدر. عالی پاشا طرفندن دول سائر سفراسنه واقع اولان بیاناتده غورچاقوفک نوطه سننده مملکتین (رومانیا) مسئله سی موضوع بحث ایدلمکده ایسه ده اوراده حادث اولان تبدلاته قارشى طرف دولت علیه دن دائماً سرد اعتراض و شکایت اولوندیغنی حالده مسئولیتک باب عالی یه راجع عد ایدله سی مغایر حقانیت بولوندیغنی، و بعض حکمداران و پرنسیره احترام ضمننده رکوبلرینه مخصوص سفائن حربیه نک بوغازلردن دخولنه مساعده ایدله سنی احکام معاهده نک اخلاالی شکننده کوسترمک وبالذات روسیه سفیرینک التماسی اوزرینه روسیه خاندان ایمپراطوریسی اعضاسی حقنده دخی مساعده مذکور نک اجرا اولندیغنی باب عالی علیه ده دلیل مقامنده سرد ایتک نه درجه شایان استغراب عد اولونمقله اتیان قلنمشدر. اولبابده دولته اتخاذه مقتضی خط حرکت دایر خواص وکلاجه تکرار جریان ایدن مذاکره نتیجه سننده انکلتزه، آوستریا، وایتالیادولترى طرفندن بومسئله ده روسیه نک حرکت متخذه سی تقبیح اولونمقله برابر انکلتزه دولتی آوروپانک شیمدیکی حال شورشی آراسنده امور شرقیه ایچون حرب ایتمکدن مجتنب وبر مدتدن بری طوغرودن طوغرویه کندى

منافعنه تأثیری اولمایان موادده طوتدینی اصول بیقیدی بی بوزمقدن محترزاووب مصلحتک برقونغرہیہ حوالہ سنی متعنی کی بولوندینی روسیہ قاپینہ سنہ کوندردیکی جواب رسمیدن استدلال اولونمقدہ واحوال حاضرہ حربیہ دن (فرانسه وپروسیا محاربہ سی) عارض اولان دہشت و وحشت حسیلہ دیگر دولترده شرقده قان دوکمکی و آلمانیا غائلہ سنہ برده شرق مسئلہ سنی قاریشدرمنی ایستہ مہ مکدہ بولوندیغندن وروسیہ لولرک اعلانی صورت قطعیدہ اولوب بونی کری آلمق احتمالی اولمادیکی کی دولت علیہ نک متفقسز حرب تجاوزی اختیار ایتہ سی دخی عقلہ ملایم کلمہ دیکندن، و بو مسئلہ ایچون برقونغرہ عقد اولونمش اولسہ غایتی اعلان مذکورک بر صورت مشروعیہ قونولمہ سندن یعنی دولتر واسطہ سیلہ معاہدہ نک تعدیلندن و مقاولہ منضمہ نک فسختندن عبارت قالہ جغندن، و یاپیلہ جق قونغرہ دہ احکام سائرہ عہدیہ نک دہ مذاکرہ سنہ کیریشیلہ جنک اولورسہ سلطنت سنیہ جہ مخاطرات و مضراتی منتج واولیلہ برقونغرہ تشکیلنک قبولندہ کی محذور اعلان مذکورک تصدیق و قبولندہ دوشونیلن محذورلردن اشد اولہ جغندن بحث ایدلدکن صوکرآ شاید انکلتزہ، آوستریا، وایتالیا دولترلی روسیہ قارش اعلان حرب ایدرلرسہ دولت علیہ دخی آنرلہ ہمدست اتفاق اولمق فقط ایشک برقونغرہیہ دوشورلہ سندن بغایت حذر و محاببت قلنمق ایجاب ایدہ جکی جہتلہ اول امردہ دولترک مرام قطعیلری بالاستیضاح حرب ایتہ یہ جکلری رسماً و حقیقہ تین ایلہ دیکی حالہ قونغرہ عقدی صورتی کچیشدیریلہ رک دولت علیہ جہ روسیہ نک اعلانی بعض شرائط قویہ ایلہ قبول اولونہ جغنگ دولترہ تبلیغی تحت قرارہ آلتشدر .

اولبابدہ انکلتزہ دولتی طرفندن روسیہ یہ اجرا اولونان تبلیغاتہ پرنس غورچافوفک ویرمش اولدینی جوابدہ روسیہ دولتنک اعلانی لایتغیر اولدینی ایراد و معاہدہ مذکورہ نک سائر مادہ لری احکامنہ کما کان رعایت ایدیلہ جکنہ دائر اعطای تأمینات اولوندینی اکلاشلہ سی، وپروسیا دولتنک دخی صورت مصلحانہ دہ حل مسئلہ آرزوسیلہ بو مادہ یہ مخصوص اولمق اوزرہ بر قوتفرانسک انعقادی رأی و مطالعہ سندن بولوندینی پروسیا سفیری طرفندن صورت محرمانہ دہ بیلدیرلمہ سی اوزرینہ کیفیت بین الخواص یکیدن موقع مذاکرہ یہ قونولقدہ کرچہ آوستریا خارجیہ ناظری قوت بامست جانبندن ویانہ دہ بولونان سفیر مزہ طرف سلطنت سنیہ دن ایشہ اولاشدید بر پروتستو ایلہ باشلانیلوب بالآخرہ مجبوریت حاصل اولورسہ موافقت یولنہ کیدلمہ سندن تہلکہ اولمایہ جنی وادیسندن ایراد مطالعات ایدلمش ایسہ دہ مصلحتک بو طریقہ سوقی شدتلہ کیدیلن بریولدن مجبوریت کوروب عودت ایتک دیمک

اولغله نتیجه سنده قدروشانه بیهوده شین کتیره جك و ایکی دولت آراسنده بوش بوشنه برودت علیه براقه جق تهلهکلی بریول اولدیغی، وشمیدی به قدر دولترلر دن آلنان معلومات وکوروین اماراته نظراً انکلیز لرك و آنلره تبعاً اوستریا وایتالیانك روسیه دولتنه سلاح ایله جواب ویرمك درجه سنده قدر کتمه لری ملحوظ اولمادیغی، و روسیه نك ایسه اعلان ایله دیکی قراری تغیر ایتیه جکی تأ کد و تعین ایله دیکی، و سلطنت سنیه اعلان مذکور ی قطعاً رد ایدوب روسیه دولتی ده بوندن رضاسیله رجوع ایله مه نیجه یاسکوت ایله ایشی بلاقید و شرط حالنه ترك ایتك و یا خود دولت مشارالیه یی اشبو قرار قطع یسندن بالکله چویرمك مقصدیله برأ و بحرأ تجاوزی حرکاته قیام ایله مک لازم کله رك بوبابده مدعی اولوب ده صو کرا دعوا یی حالنه براق مضر اوله جنی کی دول ضامنه نك اتفاق و اشترا کی اولمقسزین حرب تجاوزی اختیاری دخی حسب الوقت محاذیر و مشکلاتی استلزام ایده جکندن، و معاهده نامه یی امضا ایدن، دولتلرک نیات و افکاری مسئله نك بالذا کره بر نتیجه مصلحانه یه ایصالی مرکزنده و دولت علیه نك دخی آنلره همدست اتفاق اولمه سی تحت الزمینده اولوب ایشك بلاقیود بر مکالمه دولیه یه حواله سی حالنده روسیه لولرک صدودن خارج مسئله لر و معاهداتک سائر احکامی اوزرینه ادعالر ایرادینه قالدشمه سی مذاکرات سابقه ده درمیان اولوندیغی وجهله داعی محاذیر کورو نمکده ایسه ده پروسیا دولتنک رأى و مطالعه سی کی یالکز سفرانك اجتماعیه مشروطاً اجرای مذاکره اولونمه سی اولبابده کی محاذیری دافع اوله جغندن، معاهده مذکور ه نك مواد سائر ه سندن و موضوع بحث اولان مسئله خارجنده دولت علیه یه دائر هیچ برشیدن قطعاً بحث اولونماق و سلطنت سنیه نك احوال آتیه سنجه تأمینات قویه آلتق شرطیله « لوندره ده دول معاهده سفراسندن مرکب بر مجلس مکالمه عقدی صورتنک طرف دولت علیه دن دخی قبولی » قرار لاشدیرلش، و بالاستیدان صادر اولان اراده سنیه موجب نیجه دول معظمه نزدنده بولونان سفرای سلطنت سنیه یه او یوله تبلیغات اجرا قلنمشدر

پرنس بسمارقك مسئله مذکور ه حقنده دول معظمه سفراسندن مرکب اوله ق لوندره ده بر قونفرانس عقدی حقنده کی فکرینه انکلتزه دولتی روسیه نك درمیان ایله دیکی تکلیفک اسباب موجبیه سی هر درلو تعهداتدن آزاده اوله رق محاکمه ایدمك و قره دگزك بیطرفلغیله بوکا متفرع ماده حصر مذاکره اولونماق شرطیله موافقت و دول سائر ه دخی بوفکره مماشات ایله دیکندن بسمارق، اوستریا وایتالیا دولتلریله دولت علیه یی رسماً قونفرانس عقدینه دعوت ایتدیکی کی فرانسه دولتنک دعوتی ده انکلتزه حکومتی درعه ده ایله مشدر .

بوصورتله قونفرانسك انعقادى تقرر ایتمه سی اوزرینه کیفیت مجلس مخصوص وکلاجه تکرار بتکرار موقع مذاکره قونوله رق و اولبابده ابحات کثیره جریان ایدهرک نتیجه مذاکراده تنظیم و تقدیم قلنان ۱۸ رمضان ۲۸۷ (۱۸۷۰) تاریخلی مضبطه مفصله ده دول معاهده قره دگزک بیطرفلغنك فسخنی تمامیت ملکیه سلطنت سنیه یه طوقونور و اوجهتله حسب التعهد مستلزم حرب اولور بر ماده عد ایتمه یوب انکلتزه دولتنك و آکا تبعاً آوستریا و ایتالیا دولتلرینك بونك ایچون بزمله برابر روسیه یه قارشى سلاحه مراجعت ایتك ایسته مدکلرینی شمدی یه قدر جریان ایدن مخبرات و تحقیقات اثبات الله مش و متفقسنز حرب تجاوزی اختیارینك مضرات عدیده سی میدانده بولونمش اولمه سیله شو مطالعات اوزرینه قونفرانسه اشتراکه صورت قطعیه ده قرار ویرلدکن صوکر قونفرانس تشکیلندن مقصد مصلحتی بین الدول بر صورت مشروعه یه قویمقدن عبارت بولوندیغندن بواساسه کوره دولت علیه مرخصنك اتخاذ ایتمه سی لازم کان طریق موقع بحثه قونولدقده مسئله ده درت صورت تخطر اولونوب، برنجیسی روسیه دولتنك مطلبنی ولو دول سائر قبول ایتسه لر بیله دولت علیه مرخصنك رد ایله پروتستو ایدهرک چکلمه سی، ایکنجیسی دول سائر مرخصلری طرفندن اکثریت آرا ایله هر نه یه قرار ویریلیر ایسه آکا موافقت اولونمسی، اوچنجیسی روسیه لولرک میدانه قویمش اولدقلری تکلیفه موافقت ایدلمکله برابر سلطنت سنیه نك منافعی مستلزم اوله جق بعض موادك تکلیف قلنمه سی، دردنجیسی یالکز احکام عهدیه نك تحکیمی (احکامی) شرطیه تکلیف مذکورک قبولی صورتلری اولدیغنی، و شق اولک اختیاری ایشی یا حربه چکمک و یا خود بر پروتستو ایله براقوب روسیه نك یاپه جنی دونانمای سیر ایدوب اوتورمق ماده لرینی منتج و هرایکی تقدیره کوره مضراتی موجب اوله حغندن شق مذکور مجروح کوروندیکی، شق ثانی وجهله علی الاطلاق مجلس مکلمه ده هر نه یه قرار ویریلیر ایسه آنی قبول ایتك سلطنت سنیه نك شان و حقوقنه موافق دوشمه یه جکی، شق رابع ایجابجه روسیه لولرک مطالبی یالکز احکام سائر عهدیه نك تحکیمی التماسیه بلاعوض ترویج و قبول ایدیله جک اولورسه حضور محکمه دولیه و انظار ملیه ده بو حرکتیز تقدیر اولونمایه رق درلو ذهاب و اوهامه سببیت ویره جکی، و شق ثالث وجهله روسیه نك تکلیفنه دولترلله بالاتفاق موافقت حاصل اولدیغنی تقدیرده بوکا مقابل عهداً برشی طلب ایتك، مصلحتك داخل و خارجاً کورولن شکل و حالنه موافق اوله جنی بعدالبيان مقابله استحصال قلنه جق منافع خصوصنده خاطره کلن صورتلردن هر برینك درجه امکان و عدم امکانی و بو منافعك معاهده موجوده نك

داخل ویاخارجنده آرانلهسی مادهسی سنجیده میزان محاکمه ایدیلرک، و مقابله مطلوبه هر حالده معاهده ایچنده آرانلق موافق کوروله رک، سلطنت سنیه نك بحر سفید و سیاه بوغازلری اوزرنده توثیق حقوقی جهتیه کیدلمه سنده اتحاد آرا حاصل اولمشدر . اولبابده تعاطی ایدیلن افکار نتیجه سنده مذکور بوغازلرک انسدادینه دائر اولان نصوص عهدیه نك بلاقید و شرط ویاخود سلطنت سنیه نك بوغازلری ایسته دیکی دولت سفائن حربیه سنه کشاد ایدوب ایسته مدیکی دولت سفائنی ادخال ایتمه سی شرطیه الغاسی در میان اولونه رق، بوغازلرک سدی مرمره دگزینک و او مناسبتله تختگاه سلطنت سنیه نك تأمین قضایه - نندن نشأت ایله دیکی جهتیه علی الاطلاق هر دولت سفائن حربیه سنه هر زمان ایچون آچیلمه سی ، طریق خاصک طریق عامه تحویلی قیلندن بولونمه سیله ، رهین جواز اوله مایه جنی کی ایسته نیلن دولت سفائن حربیه سنک ادخالنه مساعدده اولونوب ایسته نلمه بنلرک دخولنه ممانعت ایدلمه سنه دولت علیه نك صلاحیتی اولمق اوزره انسداد حقنده کی احکامک المحاسی طلب اولونمه سی حالنده ده سلطنت سنیه ایله مصافات کامله سی اولان ایکی دولتدن برینک سفائن حربیه سنک مروری حقنده کی التماسنه مساعدده ایدیلرک دیکرینک قبول اولوننامه سی کی بر امر اختیارینک الی الابد سوء استعمالدن محافظه و علی الخصوص روسیه لولرک بحر بالطقدن کی کتیروب بحر سیاهه کچیرمک ایچون ایسته یه جکلری محقق اولان رخصتله سد ابواب مساعدده اولونه بیلمه سی صورتلری بشقه بشقه جای ملاحظه ایسه ده پایتخت سلطنت سنیه نك آناختارلری ایادی اجانبدن قورتاریلوب اصل صاحب ملکک ید استقلالنه آلتیق و بوضورتله روسیه نك قره دگزده یاپه جنی دونانمانک وقتاً من الاوقات ایده بیله جکی مضراته قارشى دولتک عندالایجاب دول معاهده دن برینک سفائن حربیه سنی بوغازدن ادخاله صلاحیتی اوله رق بر قوه دافعه دهما استحضار قلنمق خصوصنده کی محسنات محاذیر ملحوظه یه غالب کورونمه سیله منتهای مذاکره اولمق اوزره قره دگزک بیطرفلغنگ الغاسی قرارینه دولترلره برلکده موافقت اقتضا ایله دکده احکام سائرۀ عهدیه نك تحت تأمینۀ آلمه سیله برار بوغازلرک انسدادینه دائر اولان احکامک صورت مشروحه یه توفیقاً تعدیل ایدلمه سنه بالاتفاق قرار اعطا و اولبابده اراده سنیه ده استحصال قلندقدن صوکره لوندره سفیر مره تعلیمات لازمه ویرلمشدر .

عقد اولونه حق قونفرانسه فرانسه دولتنکده اشتراکی طبیعی اولدینی و او صره ده فرانسه حال حربده و پایتختی تحت محاصره ده بولوندینی جهتله طور شهرنده تشکل ایدن هیأتی تمثیل ایتمکده اولان مشهور «غامبتا» اداره جدیدۀ ملیه پی اروپایه تصدیق ایتدیرمکه وسیله اولمق

ایچون قونفرانسه اشتراکه طرفدارایه ده اوزمان خارجیہ نظارتی وظیفه سنی ایفا ایله یین وپارسده
محصور بولونان «ژول فاوور» دولتره کوندردیکی تحریرات عمومیه . فرانسه نك قونفرانسه اشتراکنی
آوروپا طرفندن تمامی ملکینک تحت ضمانه آلمه سی وپارس شهرینه ارزاق ادخالیه برابر برمتارکه
عقدی ضمننده آلمانیانک اجبارایدلمه سی شرطلرینه تعلیق ایله مکده و بویله بر تکلیفک دولترجه
قبوله اقتران ایدمه یه جکی ایسه طبیعی کورونمکده ایدی . نهایت انکلترونک اصراری
اوزرینه فرانسه دخی قونفرانسه اشتراکه موافقت ایله دی . فقط آراده وقوعبولان تعللات
وقونفرانسه فرانسه یی تمثیل ایدمک اولان مومی الیه ژول فاوورک پارسدن حقیقه بیلیمک
ایچون آلمانلردن مرور تذکره سی استحصالنده تصادف ایله دیکی مشکلات سببیه ولوندره ده
وقتیله اثبات وجود ایدمک بیلیمه سی قابل اوله مادی . فرانسه مرخصنک ورودینه انتظاراً
قونفرانس برقچ کره تأخیر مذاکره ایله دکن صوکره اتخاذ قراره مجبور اولدی .
عقد اولنان برنجی اجتماعده «هیچ بر دولتک بر معاهده ایله وقوعبولان تعهداتندن
رجوع ونکول ونه ده شرائطی بر اتفاق دوستانه ایله دول معاهده نك موافقتلری منضم
اولمق سزین تعدیل ایدمه مه سی قضیه سی حقوق مللک قواعد اساسیه سندن بولوندیغی» بالاتفاق
تصدیق وقبول اولوندقن صوکره اجتماعات آتی ده اساس ماده یه کیریشیلهرک، ۱۸۵۶
معاهده نامه سنک قره دگزک حال بیطرفییه وضعیه بوغازلرک هرملتک سفائن تجاریه سنه مفتوح
وکرک دولت علیه وروسیه وکرک دول سائر سفن حربیه لرینه مسدود بولونه جغنه دائر اولان
اون برنجی، وقره دگز سواحلنده دولت علیه وروسیه طرفندن ترسانهلر و حرب لیمانلری
انشا و موجودلری ده محافظه ایدمه یه جکنی متضمن بولونان اون اوچنجی، وسواحلک محافظه
انضاطی ایچون دولتینک قره دگزده قطعه وعددلری معین بعض سفائن بولوندره بقلرینه
دائر بینلرنده عقد وعهدنامه عمومییه علاوه ایدلمش اولان مقاوله نامه نك مرعیتی حقنده کی
اون دردنچی ماده لرینک الغاسیله وبوماده یه الحاق اولونان مقاوله مخصوصه نك فسخیه آنلرک
یرینه قائم اولمق اوزره ۱۸۵۶ تاریخی مواد عهدیه نك اجراسنی تأمین ضمننده باب عالی
لزوم کوردیکی تقدیرده در سعادت وقلعه سلطانیه خلیج لرینی (قره دگز وچناق قلعه بوغازلری)
وقت حضرده دخی دول متحابه و متفق سفائن حربیه سنه کشاد ایتک حقنی حائر اولمق
اوزره مذکور خلیج لرک سدی قاعده سنک ابقاسنه، وقره دگزک دول متحابه تبعه سندن
بولونان هرملتک سفائن تجاریه سنه کافی السابق مفتوح بولوندرلمه سنه، طونه مختلط قومیسوننک
اعضای موجوده سیله برابر ابقاسیله مدت مأموریتنک اون ایکی سنه یعنی ۱۸۸۳ تاریخنه قدر

تمدیدینه، مذکور قومیسون معرفتیله اجرا اولونمش ویا اولونه حق اصلاحاتك اثنای سفردہ بیطرف حکمنده طوتولمه سنه، و فقط دولت علیهك حقوق حکمرانیسی اقتضاسنجه طونه اوزرندن سفن حربیه ادخال و اخراجی حقك محفوظیتنه و قومیسونك وظائفنه متعلق بعض مواده قرار ویرلمشدر . پارس معاهده سنك احکامی اشبو معاهده ایله فسخ و تعدیل قلمامش اولدیغندن دول متعاهده احکام مذکورہك مجموعنی تجدیداً تصدیق ایله مشلردر (۱۳ مارت ۱۸۷۱). قونفرانسجه اتخاذ اولونان مقررات فرانسه حکومت ملیه سی جانبندن لوندره سفارتنه تعیین قلنان «دوق دو برویل» طرفندن ده بالآخره امضا ایدلمشدر . ینہ ۱۳ مارت ۱۸۷۱ تاریخنده لوندره ده دولت علیه و روسیه مرخصری بیننده عقد اولونان مقاوله نامه ده ایسه قره دگزده طرفین سفائن حربیه سنك قطعه و عددلرینك تعیین و تحدیدی حقنده کی ۳۰ مارت ۱۸۵۶ تاریخی مقاوله نامهك فسخی قرار گیر اولمشدر .

لوندره مقاوله سنك عقدی اوزرینه روسیه ایمپراطوری ایکنجی علیکساندر طرفندن غورچاقوفه اوزون بر التفاتنامه کوندریلہرك قره دگزده روسیهك حقوق عتیقه سنی تحدید و شرفنی اخلائی ایدن شروطك الغاسی امرنده وقوعبولان خدماتیه روسیهك استقلالی اقصای امللری اولان وطنداشلرینك شکرانه کسب استحقاق ایتش اولدیغی، واشبو خدمات مرغوبه سنی تقدیر آحائز بولوندیغی پرنسلك رتبه سنه علاوة اولاد و احفادینه ده انتقال ایتك اوزره کندیسنه «آلتس» عنوانی توجیه قلندیغی بیلدیرلمشدر . پارس معاهده سنك قره دگز بیطار فلغنه دائر اولان احکامنك تعدیلی مقصدیله قونفرانس عقدینه انکلتزه طرفندن موافقت اولونمه سی پارلمنتوده فرقه مخالفه رئیس بولونان «دیزرائلی» (لورد بیقونسفلید) ایله باش وکیل غلادستون بیننده بادی مناقشات و مطبوعاتجه ده وسیله انتقادات اولمش اولدیغی کی مذکور مقاوله نامهك عقدی اوزرینه پارلمنتو اعضاسندن «سر ویلیام دیلک» طرفندن ده قونفرانس مقرراتیه روسیه دولتنك ۱۸۵۶ عهدنامه سننده کی تعهداتندن قورتولمش اولدیغی، و بوضورتله وکلانك اتخاذ ایتدکری مسلک وطنك شان و شرفنی محل اولدقدن بشقه صلحك بقاسنه بیلهمدار اوله مایه جنی زمین اعتراضده بیان ایدلمشدر .

ایشته بوضورتله روسیه دولتی پارس معاهده سنك روحی مشابه سنده بولونان و مقاصد آتیه سنه بویوک حائل اولان بر قیددن تخلیص کریبان ایدہرك غرور ملیسنی تطمین ایتدی. انکلتزه دولتی ده معاهده مذکورہك بالکلیه انهدامدن وقایه سیله متسللی اولدی. ضرری ینہ دولت علیه چکدی.